

元明史料筆記叢刊

萬曆野獲編

中冊

元明史料筆記叢刊之一

萬曆野獲編

中册

中華書局

# 萬曆野獲編卷十三

秀水沈德符景倩著  
桐鄉錢 枋爾載輯

## 禮部

【國初蔭敍】洪武中太師韓國公李善長及禮部官議蔭敍之法凡五。其一曰。用蔭以嫡長子。若嫡長子殘廢。則嫡長之子孫。以逮曾玄。無則嫡長之同母弟。以逮曾玄。又無則繼室及諸妾所生者。又無則傍蔭其親兄弟子孫。又無則傍蔭其伯叔子孫。其二曰。用蔭者孫降子。曾孫降孫。傍蔭者。皆于蔭敍品遞降一級。其三曰。正一品官。蔭其子以正五品用。從一品子。則從五品用。正二品子。則正六品用。從二品子。則從六品用。正三品子。則正七品用。從三品子。則從七品用。正四品子。則正八品用。從四品子。則從八品用。正五品子。則正九品用。從五品子。則從九品用。正六品子。則於未入流上等職內敍用。如行人巡檢。司獄之類。從六品子。則於未入流中等職內敍用。如各關倉課。稅課。司局。批驗。鐵冶所官之類。正從七品子。則於未入流下等職內敍用。如遞運所。驛丞。闌填之類。其四曰。凡職官子孫許蔭一人。年二十五以上。能通本經四書大義者。敍用。其不通者。發還學習。其五曰。應敍之人。各於原籍附近布政司所屬地方銓注。詔皆從之。○按洪武此制極善。今現行者。惟三品京堂以上始許蔭。餘雖僉都御史之雄劇。少詹事國子祭酒之清華。亦以四品。不可得矣。鄙意。今任宦子孫。富豪者多縱蕩喪身。而貧弱者

或衣食不給。其小有才者至竄入匪類以辱先人。以余所見。指不勝屈。今祖制卽未能概復。謂宜裒益斟酌。如外官則五品方面以上。京官則七品科道翰林以上。居官無玷者。俱得蔭爲任子。如九品未入流之屬。使皆以次補官。能其職者。遞進如二三品官生。例得至知府以上官。如此則世胄子弟。束于一命。出則有官評。居則列仕籍。非甚不肖。猶自愛其鼎。凡縣佐及吏目典史諸官。俱不許吏人初選卽得。則缺多而人無壅滯之歎。或疑恩典太濫。則宋人尙有蔭塔剝。蔭門客者。而致仕遺疏。又得十餘人。今只以一官與子孫一人。安得稱濫。○祖制蔭官太高。如正一品。得以正五品敍用是也。以故往時。首揆或有蔭尙寶正卿者。似乎太過。但如今日之初授。璽丞亦貴極矣。惟未入流上等職事。爲巡檢司獄。此等雜職。似宜留以授異途。而行人在國初本無定員。最爲冗散。以故亦列於未入流之首。今已陞級爲三甲進士優選。不可入仕子一途矣。此又當變而通之。

【禮部六尙書】弘治十五年壬戌。繫銜禮部爲尙書者。內閣則謝遷。掌通政司則元守直。掌太常寺則崔志端。掌鴻臚寺則賈斌。而張昇正任坐部。南京則王宗彝。蓋以一時稱宗伯者六人。志端以黃冠。賈斌以監生。得之爲異。至嘉靖二十五年丙午。則北禮部爲費宏。南禮部爲王學夔。掌通政司則陳經。而陶仲文以真人。顧可學。盛端明以煉藥。南宮繫銜者。亦共六人。而六人中。惟仲文以少傅兼少保。官旣最崇。制亦最異。又弘治所無也。寅清之玷至此。

【尙書贈官】故事。贈官加故銜一級。如侍郎之贈尙書及左右都御史是也。惟尙書則贈太子少保。俱正

二品。猶曰以六卿進宮銜也。若左右都御史之贈尙書。則太不腆矣。如謂以西臺正六卿。則六卿生前。多改左都御史掌院又何也。似亦宜以東宮少保優之。

【臣下妾諡】正統以前。至尊大行後。妃嬪從殉者。俱賜諡稱皇庶母。而藩邸國王郡王有殉者。亦得請于朝。錫之諡號。此天順以前例也。至于臣下則絕無之。惟洪武間。中書省平章政事李思齊妾鄭氏。得諡貞烈。思齊本亡元大帥歸順至今官。其妾得此諡。上所以愧思齊心者多矣。又燕山護衛指揮使費德妾朱氏。贈德人。諡貞烈。至宣德間。安陸侯吳復妾楊氏。亦得貞烈之諡。吳以平西番及雲南封侯。然功不甚著。其妾得此已可異。乃都指揮使王俶妾時氏。亦賜此諡何也。宣宗以後。諡號無及妾媵者。惟大同指揮使范安死。其妾楊氏。自縊以殉。詔贈恭人。賜以誥而無諡。累朝因之。若文臣妾。則嘉靖間。故汀州知府張寧妾高氏。李氏。亦以無子。寧妻羅氏。逼之改嫁。不從。特賜旌表。亦爲異典。寧故先朝英宗時爲給事。與岳正齊名。吾鄉人也。

【封諡同本人名】諡以易名。以故翰林官俱得諡文。而林文爲侍講學士。乃諡襄敏。至陳文諡莊靖。王文諡毅敏。二公則又殿閣大學士也。俱避其名以存厚。遂爲故事。惟金尙書忠。諡忠烈。則此時禮制未備。其後林文俊乃諡文修。陳文德亦諡文恭。則或以聖眷優異。子孫不敢請改。然部擬已不爲之諱矣。若洪熙元年。英國公張輔。以奉天靖難。推誠宣力。爲號久矣。又加輔運二字。雖云隆重。實斥其名。何耶。宣德二年。英宗誕生。立皇后孫氏。是爲孝恭后。后父孫忠。進封會昌伯。其勳號乃爲推誠宣忠翊運。武臣

曾不避其名。又何也。豈以后父之尊。不敢稱宣力耶。成化初。周壽以帝舅封慶雲伯。亦仍宣忠之號。自此後。弘治之壽寧侯。正德之慶陽伯。雖皆后父。無不改稱推誠宣力矣。此後宣忠字面。即他勳臣亦不復見。○隆慶初。給故新建伯王守仁誥券勳號。亦有守正二字。則以二名不偏諱也。

【粗婢得封】夏文愷嬖妾蘇氏。詐稱再繼之妻。上請得封。當時以夏爲恣肆。然先朝楊文貞士奇已有之。楊元配爲嚴夫人。歿後。以婢郭氏侍巾櫛。宣德中命婦朝賀。獨西楊無婦。太后乃命召郭氏入。以其貌寢衣儼。特爲妝飾。服珥甚華。因盡以賜之。旋命所司。如例封授。但不許爲例。此即南太常少卿導之生母也。當時陸容紀其事。而文徵明駁之。云不然。容之子陸粲。又駁之。云郭夫人制詞。載文貞續集附錄中。安得云無。蓋徵明一時失記耳。

【胡忠安】胡忠安。福履貴盛。爲本朝僅有。然其人惟務迎合取寵。且惑于方技旁門。殊無大臣之節。其素行不具論。即如宣德元年。胡尙爲禮部侍郎。正一副教真人張宇清。欲求龍虎山道士八十一人度牒。而難于自奏。托淡代請。上曰僧道牒。祖宗有定制。無托求請之理。朕不惜宇清。惜其教也。爾以吾意諭之。爲淡者可以愧死矣。不踰月呂震卒。即代爲禮部尙書。他未暇建白。首請賜貴妃孫氏寶冊。其言曰。貴妃賢淑如此。宜授寶冊。以昭其德。上大悅。即命鑄寶。令禮部具儀注以聞。本朝貴妃有寶始于此。至期。命太師英國公張輔。少師吏部尙書蹇義爲冊寶使。二公文武首臣。用冊皇后禮也。又踰年而恭讓胡后廢。貴妃代爲中宮。是爲孝恭后。皆淡啓之也。冊貴妃之次日。淡又疏請。進封真人張宇清爲大

真人。掌天下道教。上允之。當時已深結宣宗之知。遂得如所乞。皆上元年內事也。此後薦方士。薦左道。以致其家門被謗。蓋一時得柔佞之力。且曾受文皇密遣。潛使天下十年。又能白仁宗在青宮之誣。故始終恩禮不替云。○宣德三年。立中宮孫氏。又奏秦王志潔賀表。文詞簡略。不敬當罪。上不可。蓋其諂諛多如此。其後請賀白鳥。賀白兔。賀驪虞。賀景星。賀外國貢麒麟。十年之間。貢媚無虛日。上皆謙讓不允。至英宗登極。而其說盡行矣。

【禮部三失印】胡忠安濬最受文皇寵眷。宣皇初年。卽正位宗伯。凡三十餘年。十知禮闈貢舉。其榮遇古今所少。然在事失去本部印者凡三度。其初皆蒙恩貸。最後下獄。而印偶獲。則部吏所盜也。上始宥之。又俛首春曹者十五年。直至英宗復辟始引退。人知其久享高位。生拜少傅。死贈太保而已。不知其辱也。又道士蔣守約者。濬同里人。因薦之朝。歷官亦至禮部尙書。掌太常。濬與同列者數年。又同致仕。史又稱江西南城人龔謙者。多妖術。能誘惑婦人。自稱張神仙之法。孫因所誘婦人曹氏。見知于胡濬。濬方掌禮部。因舉爲天文生。更其名曰益之。旣而冒濬名。詐取人賂。事覺。法司論當徒。上怒。命充鐵嶺衛軍。謙往來濬家甚習。頗有醜聲。士論恥之。至景泰間。濬又奏道士仰彌高者。曉諳陰陽。精通兵法。臣見其講論機略。畫列陣圖。深有妙理。若使協坐守邊。運謀剿賊。必能宣威攝敵。成撥亂之功。乞命兵部公同內臣試驗。委以責任。下以紓軍民征伐轉輸之勞。上以佐國家雍熙太平之治。事下兵部。召仰彌高會官試之。不如濬所言。帝以大臣保薦。授道官。爲右元義。于宣府等邊。協助守邊。史謂彌高初無他長。

惟出入澆家。故深許之。未幾彌高奏稱。身在宣府。運謀協助。請以朝天宮道士朱可元。代己住持。澆又疏乞允所舉。于是禮科劾奏彌高援黨妄爲。宜治罪。帝命彌高行巡按御史鞠問。可元亦送刑部擬罪。爲忠安者。尙腆顏不去。亦頑鈍極矣。○忠安生。頂髮皎白。踰月始黑。其母夢僧入室。因而誕育。尋果有僧來求觀。見僧卽笑。僧曰。此吾師吳中天池高僧也。當時曾囑吾以笑爲證。然則忠安者。其亦史彌遠爲覺長老後身類耳。

【改謚】本朝文臣謚忠文者止二人。一爲翰林待制贈學士王禕。一爲國子祭酒贈禮部右侍郎李時勉。然王建文初謚文節。正統間改。李景泰初謚文毅。成化間改。俱非初謚也。此外惟景泰初。吏部左侍郎兼翰林學士。直內閣。贈少傅。吏部尙書。文淵大學士曹鼎。謚文襄。天順又改文忠。又景泰四年。南京禮部尙書王英。卒謚文安。後改文忠。此後文臣無改者。直至嘉靖初年。大學士石瑄謚文隱。則以議大禮時。依違兩端。其死時。正其門人張璠在揆地。心恨甚。故以違拂不成謚之。嘉靖末年。大學士張治。亦謚文隱。則以直齋宮青詞。意鬱鬱不樂死。上銜之。故以懷情不盡謚之。二人至隆慶間。石改文成。張改文毅。又至今上壬午。而大學士殷儋卒于家。謚文通。則以新首揆張四維。素與不嫌。故得下謚。後其家請于上。亦得改文莊。蓋文臣改謚者。止此七公。然皆出詞林。最爲奇事。又本朝文臣有謚。亦自王禕始。【提學憲臣革復】提學憲臣。累朝無之。蓋國初最重教職。一切儒生殿最。俱校官主之。以此威行一方。至出監司上。其後此選日輕。而鬻序之進退褒貶。猶然專領。時皆病之。于是正統元年五月。始添設憲臣。



首用大臣薦。以御史薛瑄爲山東提學按察僉事。至于各省直以次設立。至景帝景泰元年盡數革去。蓋其時太上北狩。兵事方興。不復加意儒科。且用禮臣周洪謨議也。至天順六年。英宗始命仍舊。以至于今。蓋廢憲臣凡十三年而始復。按元人最輕文事。至兩罷科舉。然猶設各路儒學提舉。以統教授等官。明八十餘年。始以憲臣督學政。時三楊同在政府。建此良規。乃無故而盡罷去。時陳泰和當國。固不足道。若高文義、彭文憲俱在閣。當任其咎矣。

【任子再蔭】任子少有至三品京堂者。間有之。多不滿考。以故未聞再得蔭敘。惟宣德間。高密儀銘。以父禮部左侍郎諡文簡。儀智蔭授禮科給事中。尋改翰林修撰。後以郟邱舊恩。歷官太子太保。兵部尙書。諡忠襄。已爲任子極榮矣。銘歿後。景帝念之。又蔭銘子泰爲禮科給事中。最爲異典。然非三世同朝。且身後遺澤耳。惟穆宗登極大霈。元輔徐華亭以羽翼大功。馳先錄後。自不必言。而其子太常卿。掌尙寶司徐璠。亦以三品京堂。蔭子肇蔭爲官生。則其時父子同在班行。尤爲奇遇。實國朝所未有。

【尙書久任無贈官】尙書九年得一品。此成例也。成化間。鄞人陸瑜者。以刑部尙書致仕。卒諡康僖。瑜以天順二年正位司寇。至成化二年得請。凡位六卿者十六年。蓋四考滿矣。而不進一階。似爲上所厭薄。然旣歸而得易名之典。乃終無贈官。又何也。代瑜者爲董方。任甫二年餘。而卒於位。乃得贈太子少保。是時彭文憲當國。何以處分如此。其中必有說。

【贈禮部尙書】自弘正以後。北大宗伯。皆以詞臣拜。間有自外入者。嘉靖間則席書。萬曆間則徐學謨。二

人耳。若外僚他部侍郎。得贈此官。則前朝間有。今絕無之。惟孫忠烈燧得贈。以殉節特膺異典。其後許忠節達亦緣孫例得贈此官。近日吳疎山悌以南京刑部右侍郎。直贈禮部尙書。此累朝罕見之事。吳清修著聞。且講理學。亦無忝春卿。但得此曠典時。其子故選君繼疎。仁度方起清卿嚮用。而孫富平掌銓。又舊堂屬相知。故其覆疏云。悌品望與黃孔昭相同。宜優以秩宗。不爲例。及仁度又請諡。署禮部侍郎翁正。奏覆疏云。悌贈官既同孔昭。則易名亦宜照例。況理學之邃。加之以文。允宜內閣票旨曰。吳悌准諡與文字。上遂允行之。此等卹典。百年來所無。一時言官亦無敢議之者。

【諡號】大行諡號。本朝俱用十六字。說者以爲過濫。前者所無。此未之考耳。唐時用諡。雖止七字。至肅宗已增至九字矣。又至懿宗時。加諡宣宗。爲元聖至明成武憲文睿知章仁聰明懿道大孝皇帝。遂至十八字。此開闢未有也。至宋太祖。諡啓運立極英武睿文神德聖功至明大孝皇帝。亦至十六字。惟太宗減爲六字。稍稱近古。而眞宗之崩。復用十六字。自此仁、英、神、哲、徽五宗。無不十六字者。而徽宗大觀中。又加神宗爲體元顯道法古立憲帝德王功英文烈武欽仁聖孝皇帝。則二十字。尤爲創見。惟欽宗減爲六字。而南渡高宗。仍十六字。以至孝、光、寧、理。皆循用之矣。夫多詞繁稱。誠爲溢美。然以臣子寸誠。歸美君父。卽極意揄揚。亦無不可。況有往代故事可倣乎。論者至云。唐宋所未有。正坐不精核耳。若必以遼古爲準。則文武成康。止得一字。卽二字已贅。此顏清臣不能得之唐者。○嘉靖十七年。加上太祖尊諡。亦至二十字。

【辛丑二宗伯】嘉靖辛丑科。詞林二宗伯。一爲烏程董溥陽。一爲華亭陸平泉。櫛聲。吳越接壤。相去不三舍。董先貴。世宗朝寵眷隆赫。以忤旨削籍歸。又十八年而陸始正春卿之席。則今上龍飛。江陵欲收陸以爲重。且示意卽入揆路。將主甲戌會試。陸知其爲乃子登進地。屢疏始允歸。遂不出矣。至戊子年八十。撫按爲請於朝。得存問。且加太子少保。董次年己丑。亦登八十。巡按御史蔡系周亦爲之請。時申吳門當國。王太倉爲次揆。俱董壬戌所舉會試廷試第一人。業已允行。而御史萬國欽駁之。備數董立朝邪佞。居鄉不法諸狀。成命爲寢。是年董之子給事道醇歿於家。而陸之子彥章適登第拜行人使歸。則情境大不侔矣。又七年乙未。董之長孫禮部郎嗣成在侍。而次孫嗣昭成進士。歿於京邸。董宗伯不勝痛。尋病卒。禮部君亦坐家難。憤恚發疾死。年亦未四十也。又三年戊戌。陸登九十。上遣中書柴大履存問於家。時申、王兩公俱以首揆居里。同執羔雁往賀。修後進禮。隅坐屏息以侍。觀者榮之。而董八十時。兩公門生方在事。且遭萬抨章。更無此盛舉也。又三年辛丑。而陸之同邑張以誠舉狀元。適值一甲子。陸喜甚。以年弟帖投之。雖屬戲劇。然實清朝所希觀者。陸後再膺存問。九十七而下世。飾終贈諡之典大備。尤非董所敢望。二公品行。世所共見。不復置喙。特紀其同登第。同詞林大寮。同高年林下。同在三吳一方。而後先榮悴不同如此。○萬一愚侍御糾董宗伯疏。首引先大父先君遭辱爲言。至云沈某父子。嘗從大夫之後。偶因出遊。未遑趨避。而衷甲之士。奮呼羣起。幾不獲生焉。此實傳聞之過。先人奉使歸侍膝下。游吳之光福山。正董塋墓地。適給事道醇。時爲行人。亦以省墓至。給事故先人鄉同年也。

偶舟人爭鬪。彼輿僮甚衆。不無稍紛擾。尋已講解罷去。相忘久矣。萬久在公車。游學吳越間。習見董氏諸奴之生事而惡之。以故入臺卽首上疏。偶知余家小相失一事。遂引爲確證。聞宗伯甚不樂。意謂寒家與聞。是時先君已早世。余在保抱。安知臺臣白簡所自來也。給事少子斯張。少年負雋才。與予善。

【董伯念】董伯念爲給事長子。先給事登第。壬辰以疏論國本。斥爲編氓。時宗伯貲產過厚。怨滿一鄉。伯念思稍散之。以結人心。宗伯不謂然。而伯念奮然行之。舉故券以示小民。或止半價。或許回贖。各有條緒。湖俗故囂悍。至此不以爲恩。反共訐董氏。直謂諸產俱屬白佔。欲盡徒手得之。咻咻者日千百人。伯念不能無中悔。而御史彭魯軒應參來按浙。彭爲令負清勁名。在西臺亦錚錚者。巡方入苕。諸仇董者。爭先投牒。填塞途巷。并及故祭酒范屏麓。應期。彭受兩家詞。俱以屬郡邑。追逮紛紜。兩家紀綱用事者。盡入狴犴。祭酒不能堪。至雉經死。范事得小解。而伯念日夜爲乃祖所恨。乃謀之吳江一斥生周姓者。嗾祭酒夫人上疏鳴冤。范於今上初元。曾備員講官。上見疏大怒。給事孫鵬初羽侯等。復合疏糾彭之橫。御史逮去。并撫臺王洪陽。汝訓亦罷歸。董氏事漸以消弭。而伯念與宗伯。以憂勞成疾。相繼下世矣。伯念有才名。其志業不凡。不幸爲富貴所累。以致短折。惜哉。○王中丞先爲光祿少卿。以糾浙人吏科都給事中陳隅陽。吳郊。不勝。調南去。至是有浙撫之命。陳已從太常罷官居里矣。意王之修怨而懼。托所知調於王以釣之。王毅然正色曰。往日在朝。議論相左。此國事也。今受命此方。則彼申部民之禮。予修式廬之敬。若以往事介懷。非人矣。陳遂往調。賓主歡然。終王任無有以陳氏投一詞者。人謂王爲

長者云。

【下諡】諡法。寵祿光大曰榮。本下諡也。得之者類非名碩。然惟嘉靖間最多。上初登極。禮部尙書文淵閣大學士。贈太子太保袁宗皋。諡榮襄。則故長史。以從龍峻遷。在位不數月耳。其後則太子太保。禮部尙書邵元節。諡文康榮靖。少師兼少傅少保。禮部尙書。恭誠伯陶仲文。諡榮康惠肅。二人俱真人。帶銜且特加四字。尤非典故。無足道者。至太子太保。禮部尙書顧可學之諡榮僖。太子少保。禮部尙書盛端明之諡榮簡。二人俱以甲科起。盛又出詞林。而得此等諡。則以煉藥進。非可士人比也。若駙馬都尉。京山侯崔元。以直齋宮奉玄。亦諡恭榮。又如定國公徐光祚。諡榮僖。鎮遠侯顧士隆。諡榮靖。成國公朱奉鳳。諡榮康。會昌侯孫果。諡榮僖。安昌伯錢承宗。諡榮僖。安平侯方銳。諡榮靖。昌化伯邵喜。諡榮和。瑞安侯王源。諡榮靖。則猶勳戚臣也。若世宗初年之眷汪誠齋。以太子太保。吏部尙書。且附麗張永嘉。受上異眷。僅得諡榮和。至末年則寵任袁元峰。幾出徐文貞上。袁以少傅戶書。建極殿大學士。得請。歿贈太傅。亦僅諡文榮。蓋汪死時。適永嘉甫去。而李任邱代之。故不得佳諡。袁之歿也。爲徐文貞所快。因亦以下諡與之。又如禮卿盛端明。卒於庚戌年。亦諡榮簡。盛亦上所眷也。又如至所眷也。共二十二字。據寫本補。世宗於諸公。生前嚮注。何等隆赫。而比其亡也。雖修易名故事。僅比帷蓋之恩。其生平品行心術。盡入聖鑒久矣。肅皇之肅也。諒哉。

【南禮部卹典】世宗朝。大臣卹典。最不易得。如湛甘泉。若水。以理學名天下。官南京禮部尙書。年九十七。

其歿也。吏部爲請卹典。上大怒。謂若水僞學亂政。并太宰歐陽必進。奪孤卿官銜罷歸。他如閣臣石琚。張治。俱以微忤諡文隱。石以違拂不成爲義。張以懷情不盡爲義。皆上所親定。蓋聖意示貶於褒也。惟南禮部尙書章懋。得起二品。竟贈太子太保。特諡文懿。邱寶。孫陞。江瀾。顧清。楊廉。俱以南禮部尙書。贈太子少保。特賜邵諡文莊。江諡文昭。顧諡文僖。孫。楊諡文恪。五公官同湛甘泉。而名出其下。乃加秩易名。飾終之典甚備。豈湛果有遺行。爲上所默窺耶。又如南禮部之贈禮書者王瓚。諡文定。崔銑。諡文敏。陳陞。諡文僖。皆三品也。又他曹贈禮書者。南吏侍羅玘。諡文肅。南工侍黃孔昭。諡文毅。又如南吏部侍郎林文俊者。亦歿於嘉靖之丙申。未滿考。得贈南禮部尙書。賜諡時。禮部擬文良。又擬文恪。上皆不允。御筆特改曰文修。其得此諡者。本朝止林一人耳。世宗之待大臣權衡。必有說矣。○湛至隆慶始補贈諡文簡。則以講學爲徐文貞所厚也。此時幸新鄭。江陵爲次揆。若居首。則終不得矣。

【四字諡】臣下四字之諡。惟宮中貴嬪蒙寵。或生皇子者有之。他不爾也。世宗朝。方士邵元節。陶仲文。俱得諡四字。此係皇祖特恩。旋亦追奪矣。今上庚子九月。佑聖夫人徐氏卒。賜諡。閣臣擬勤敬與榮安二號以進。上俱點用。閣臣以非故事諍之。上曰。徐氏奉事三朝。故特與之。後不爲例。此則古今所未有。按夫人號帶聖字者。俱係至尊乳母。今云三朝。豈皇祖阿保耶。何故存至今也。若穆考乳母。自是奉聖夫人柴氏。

【羽流恩卹之濫】故事。文臣一品。始得祭九壇。至於雜流。則不在此例。本朝惟嘉靖間。邵元節。陶仲文。以

方士得一品之恩。此最爲濫典。未幾而削奪及之矣。近日癸卯甲辰間。龍虎山真人張國祥。以齋醮久留京師。其母亦隨在邸中。病死請卹。上特賜祭九壇。蓋視文臣之品。然婦人貴至一品夫人。止得一祭。公侯母妻則二祭。卽各藩親王正妃。僅得祭四壇耳。且真人母妻俱稱元君。又非可夫人比。而濫恩至此。真堪扼腕。○按元節。絳衝宗伯。而仲文則又以禮卿並兼三孤。陶妻又先封一品夫人。其僭擬文臣猶爲有說。國祥列秩黃冠銜名。不登仕版。且今上初年。以其異服不雅。不許入班朝參。今乃得此。而禮官亦不聞堅執。何耶。先是辛巳年。上命修張真人府。言官俱謂非宜。疏諫不聽。有質之江陵公者。江陵云。此聖母慈聖太后之意。卽主上亦不能遏止。時咸謂信然。無何內傳收前所下旨。并遣去內臣取回。竟不果修。卽政府亦不知其故也。○國祥卽隆慶間革爵。降爲上清宮提點。其人是也。今上初年。復其真人。近又叨恩至此。

【非例得封】文臣滿三年考。始得封父如其官。惟軍功則或加特恩。要不以爲典例。先朝亦有未滿考而得全封者。近代則無之。惟嘉靖初。吏部侍郎溫仁和。以父河南參議。年及八十。恐不及待。以情乞封。特允之。繼而詹事董玘。以父雲南知府復。年八十三。比例乞恩。亦許之。此後絕不聞。至萬曆二十四年。禮部侍郎馮琦。以父山西參政子履病。給假省覲。亦乞恩求封。上命如所請。然馮三品。未及一年。乃翁年止六旬。尤爲異典云。三公一時名碩。乃父亦曾居方面。宜膺殊錫。其他失記者尙多。要皆禁近儒臣。故先後俱得之。非他卿佐可望也。

【協理關防】京營之制。自嘉靖二十九年。復國初三大營。以文武大臣二人主之。武稱總督。文稱協理。印曰戎政之印。則總督專掌。坐是文臣不敢專制。如咸寧侯仇鸞。則憑恃上寵。奴視協理矣。自鸞敗。文臣稍得發抒。終不能自行其意。直至今上己亥。王懷棘世揚以大司馬領協理。始請別鑄一關防。以便行事。上允之。自是協理大臣。始得與掌印勳臣均事權。又五城巡視御史。向無關防。亦近年題請始鑄給。而南京五城臺臣。亦得之矣。

【大臣補蔭之濫】嘉靖末年。朝政濁亂。任子妄行陳乞。苞苴一入。往往破例得之。今上初年。始定爲大臣身後五十年。概不准行。且永遠遵守。時張江陵勵精之始。故力杜倖門。以後又漸濫傷。如吏部尙書倪岳卒於弘治辛酉。至今上甲辰。其曾孫翰儒以補蔭請。吏部覆疏。近例雖有年遠親盡。不許補蔭之條。但岳先朝名臣。翰儒尙在君子五世之內。其他名德遜岳者不得比例。上允其補。按倪文毅之歿。至是已百餘年。歷列帝五朝。孰辨真僞。且文毅隱官無子。當時已立姪爲嗣。至翰儒支派。更難考矣。時四明爲政。固無足怪。而言官無一人糾正。宜次年大計。卽有欽留科道事矣。先是隆慶四年。故相梁文康謙有蔭子次挹天死。孫紋請補蔭。穆宗以年久不准。且命自今俱禁絕。著爲令。時高文襄拱以輔臣掌銓。謂紋所請。與濫乞者不同。請許紋。而此後皆力禁。上乃允之。高此疏雖以揆地體面。且爲己他日地。但梁之歿在世宗朝。未及五十年。次挹自以父一品九年滿得之。初非濫恩。尙靳不輕與。蓋初元錄故臣子孫稍多。識者頗以爲非。穆考至是始加愼惜。有以也。



【宗伯執持】天地分祀。出世宗意。夏貴溪附會之。以取富貴。而識者頗謂不然。隆慶初元。議論藉藉。俱謂宜復舊制。大璫李芳。因請于上。欲合祀如祖宗時。時高南宇儀爲大宗伯。力持不可。或問之曰。合祀果非是耶。高曰。吾且未論分合之是非。但以朝廷極大典禮。乃不出廷議。而出宦寺建白。他日事柄旁落。且奈何。人頗服其遠識。龍虎山張真人不法事上聞。高又請革其真人號。降爲六品提點。天下服其公正。穆皇末。命始大拜。方奉憑几之詔。遽卒。士論惜之。諡曰文端。真不忝云。○合祀之議。在當時內臣主議則不可。至今日若有言官建白。仍太祖規制。亦繼述第一義也。萬曆初年。張提點者請復本號。時同州司馬乾庵自強爲禮卿。亦執奏不許。而江陵當國。竟以中旨復真人。同州不能執矣。

【卹贈諫官之謬】隆慶登極。恩詔卹錄故臣。以建言被僂爲第一等。以故中允郭希顏遂與員外楊繼盛並列。旣而郭贈翰林光學。以詞林故事也。而贊善羅洪先。修撰楊慎。止得光祿少卿。希顏何如人。乃出羅。楊上耶。沈鍊亦論嚴嵩僂死。與楊繼盛俱止光祿少卿。而給事中錢徽等十餘人。以他事削籍。優游林下。反得太常少卿。凡超本品七級。又何也。○時列僂死首等。楊、郭、沈三公之外。又有給事楊允繩。僅四人耳。按允繩之死固冤。但疏參寺丞胡膏時。引內臣杜泰誣諂故少卿馬從謙。盜用大官食物。欲比例中以死法。膏恨怒反噬。因之得罪。夫杜泰凶豎。讒殺從謙。死有餘辜。其唾餘豈士大夫可拾者。楊公此語。不可謂非失言也。

【牙牌】唐宋士人。腰帶之外。又懸魚袋。爲金爲銀。以別等威。本朝在京朝士。俱佩牙牌。然而大小臣僚皆